

元朝天目山 中峯明本 撰

中峯三時繫念法事全集

財團法人佛陀教育基金會印贈

元故天目山佛慈圓照廣慧禪師中峯和尚行錄

禪師諱明本號中峯。杭之錢塘人。俗姓孫。母李氏。夢無門開道者持燈籠至其家。翌日遂生。師神儀挺異具大人相。纔離襁褓便跏趺坐。能言便歌讚梵唄。凡嬉戲必為佛事。九歲喪母。讀論語孟子未終卷已輟學。年十五決志出家。禮佛然臂誓持五戒。日課法華圓覺金剛諸經。夜則常行困以首觸柱自警。居近靈洞山。時登山顛習禪定。甫冠閱傳燈錄。至菴摩羅女問曼殊。明知生是不生之理。為甚麼却被生死之所流轉。有疑。已而沙門明山者。指師往參天目高峯和尚妙公。高峯孤峻嚴冷不假人辭色。一見驩然。欲為祝髮。師以父命未許。高峯曰。可舉闍夜多尊者出家因緣喻汝父。勿自沈溺。未幾誦金剛般若經。至荷擔如來處恍然開解。由是內外典籍皆達其義趣。而師自謂識量依通非悟也。時年二十有四。實至元丙戌歲也。明年從高峯薙染於師子院。又明年受具戒。又明年觀流泉有省。即詣高峯求證。高峯打趂出。既而民間訛傳。

官選童男女。師因問曰。忽有人來問和尚討童男女時如何。高峯曰。我但度竹篋子與他。師言下洞然。徹法源底。陸沈眾中。人無知者。於是高峯書真讚付師曰。我相不思議。佛祖莫能視。獨許不肖兒。見得半邊鼻。且俾參徒詣師請益。眾由此知歸。淮僧子證嘗問高峯諸弟子優劣。高峯曰。若初院主等。一知半解不道全無。如義首座固是根老竹。其如七曲八曲。惟本維那却是竿上林新篁。他日成材未易量也。壬辰松江瞿公霆發施田二百七十頃。即山之蓮華峯建大覺正等禪寺。元貞乙未冬十一月高峯將遷化。以大覺屬師。師辭推第一座祖雍主之。大德丁酉師登皖山游廬阜至金陵。戊戌結菴廬州弁山。學者輻湊。師雖拒之而來者愈眾。庚子結菴平江鴈蕩。眾既夥遂成法席。癸卯瞿公堅請師還住大覺。師力辭避之。時吳興趙公孟頫提舉江淞儒學。叩師心要。師為說防情復性之旨。公後入翰林。復遣問金剛般若大意。師答以畧義一卷。公每見師所為文輒手書。又畫師像以遺同參者。乙巳師還山廬高峯塔。丙午領

師子院。至大戊申仁宗皇帝在東宮。賜號法慧禪師。已而乞食勾吳。因謝院事。己酉道儀真即船以居。庚戌眾請還山。今兵部尚書鄭公雲翼。時僉淞西廉訪司事。候師餘杭問法。師推明經世出世之學以答之。詞見語錄。辛亥師復船居吳江。陳子聰建順心菴請師開山。既而渡江擬遊少林至汭。隱其名徧城隅土屋以居。僧俗爭相瞻禮。皆手額曰。江南古佛也。皇慶壬子結菴廬州六安山。江淞省丞相奉書訪問師去之東海州。癸丑瞿公霆發以兩淞運使終。師還弔其喪。公之子時學。奉宣政院疏復請師住大覺。師舉首座永泰代己。泰欲承嗣師。師俾泰嗣開先一山萬公。蓋以院易嗣其來久矣。聞師子風者莫不多之。丞相延師私第。懇請住持靈隱禪寺。師固辭。中書平章又請曰。師之道德孚於人者博矣。宜順時緣住一剎以恢張佛祖建立之心。無多讓也。師曰。夫住持者須具三種力庶不敗事。三種力者。一道力。二緣力。三智力。道體也緣智用也。有其體而闕其用尚可為之。但化權不周事儀不備耳。使道體既虧便無異無

算。雖緣與智亦奚為哉。或體用并闕而冒焉居之。曰因曰果寧無慊於中乎。某無其實故不敢尸其名。平章知師意堅弗敢強。師辭以末疾還山中。延祐丙辰春。上命宣政院使整治釋教。距杭期入山候謁。師聞避之鎮江。丁巳丹陽蔣均建大同菴延師居之。戊午眾請還山。九月上顧謂近臣曰。朕聞天目山中峯和尚道行久矣。累欲召之來卿每謂。其有疾不可戒道。宜褒寵旌異之。其賜號佛慈圓照廣慧禪師。并錫金襴袈裟。仍勅杭州路優禮外護俾安心禪寂。改師子禪院為師子正宗禪寺。詔翰林學士承旨趙公孟頫。撰碑以賜。特贈高峯和尚佛日普明廣濟禪師。先是駙馬太尉潘王王璋遣參軍洪鑰。齎書幣叙弟子禮。期請上命南來參叩。己未秋九月王奉御香入山。謁師草廬咨訣心要。請師陞座為眾普說。師激揚提唱萬餘言。王復求法名別號。師名王以勝光。號曰真際。王因建亭師子巖下以記其事。至治壬戌行宣政院。虛徑山席強師主之。師貽書院官卒不就。結茅中佳山將終焉。山北距西峯三十里。重溪複澗穿徑崖險。

捫蘿薜冒豺虎。緇白隨禮無虛日。師愍其跋涉尋歸草廬。十月英宗皇帝特旨降香。并賜金襴僧伽梨。詔行宣政院官。親詣山宣諭恩意。時江潮省右平章。今丞相答剌罕脫歡公。命理問官阿敦。偕院官行乞師法語。中書參知政事敬公儼亦嘗通書問法。其為天子大臣所知遇蓋如此。師每斥學者只尚言通不求實悟。常曰。今之參禪不靈驗者。第一無古人真實志氣。第二不把生死無常做一件大事。第三拌捨積劫以來所習所重不下。又不具久遠不退轉身心。畢竟病在於何。其實不識生死根本故也。凡見學者輒問曰。汝喚甚麼作生死。或者茫然無所加對。或者謂。生不知來處死不知去處是生死。師曰。便饒知得亦生死。所知亦是生死。又或指一念忽起是生。一念忽滅是死。師曰。離一念起滅亦生死也。是說皆枝葉耳。非根本也。夫根本者。性真圓明本無生滅去來之相。良由不覺瞥起安心。迷失本源虛受輪轉。以故道。迷之則生死始。悟之則輪迴息。蓋根乎迷而本乎妄也。當知山河大地明暗色空五陰四大。至於動不

動法。皆是生死根本。若不曾向真實法中脫然超悟。更於悟外別立生涯不存窠臼。豈堪向生死岸畔割腳。或纖毫不盡。未免復為勝妙境界惑在那邊。起諸異想。雖曰曉了其實未然。惟有痛以生死大事為己重任者。死盡偷心方堪湊泊。直下儻存毫髮許善惡取捨愛憎斷續之見。則枝葉生矣。可不慎乎。師子激勵後學皆此類。癸亥春一日師自敍其出家始末曰六旬幻跡。每見禪者作務。則曰。汝種蔬欲為誰羹耶。汝負春欲為誰炊耶。師蓋已有去世意。至六月十五日。折簡大用上座曰。幻菴向秋決作離散計。繼書屬門人。幻者朝死夕化。骨便送歸三塔。若停龕祭奠諷經入祠做忌。一切佛事不許徇世禮也。復條示師子寺。惟以放下節儉克究初心。慎守開山明訓令法久住之意。又遺誡門人。其畧曰。佛法無汝會處。生死無汝脫處。汝喚甚麼作佛法。任以百千聰明。一一把他三乘十二分教千七百則陳爛葛藤百氏諸子。從頭註解得盛水不漏。總是門外打之遠。說時似悟對境還迷。此事向道無汝會處。汝轉要會轉不相應。莫

見與麼說便擬別生知解。直饒向千人萬人。拶不入處別有生機。總不出箇更會底妄念。惟具大信根。叩己躬下真參實悟乃能荷負。若作荷負想依舊沒交涉。當知眾生結習濃厚無汝奈何處。汝若無力處眾。只全身放下向半間草屋。冷淡枯寂勻食鶉衣且圖自度。亦免犯人苗稼作無慚人。所以道佛法無汝會處。生死無汝脫處。既會不得又脫不得。但向不得處一捱捱住。亦莫問三十年二十年。忽向不得處驚爾拶透。始信余言不相誣矣。越十日師示疾。有來省者。師曰。幻住菴上漏旁穿籬坍壁倒不可久住也。語笑如平時。學者強師服藥。師謝之曰。青天白日曲徇人情耶揮去。僧有告歸吳門者。師曰。何不過了八月十五日去。至十三日手書遺別外護。仍寫偈遺別法屬故舊。十四日蚤作復寫偈。辭眾曰。我有一句分付大眾。更問如何。無本可據。置筆安坐而逝。停龕三日。身體溫軟顏貌不少變。有禪者乞剪爪髮供養。誤傷指端血津津出如生時。道俗數千人奉全身。塔於寺西之望江石。先是其年春涸凍山中大木皆摧折。

若世所謂木稼者。識者異之。至於歿之日白虹貫於山之顛。師生宋景定四年歲癸亥十一月二日。世壽六十有一。僧臘三十有七。初侍高峯于死關。日作夜坐脅不沾席。勵精勤苦語訣無怠。逾十年親承記蒞退而藏晦。以住山交聘避走南北。所過輒成寶坊。俗率自化。海內學者望風信慕。識與不識皆尊之曰大和尚。家繪像而敬事焉。其來瞻禮絡繹載道。祁寒暑雨逮無虛日。每填溢山寺至無以容。其道德所被。上自天子萬里延慕。屢欲召至闕庭。而卒莫之能致也。王公大人北面事師。而鄉道者傾動一世。下逮屠沽負販優伶工伎廝輿暴悍之徒。師一真慈相與隨宜說法。未嘗以高下貴賤而尊易諂瀆之也。得師半偈不啻重寶。或藏師所薙髮輒產舍利。有疑謗者一接言容。無不遷善為師外護。遠至西域北庭東夷南詔接踵來見。南詔沙門素閑教觀。東來問法。寔自玄鑑始。鑑嘗於師言下有省。繼而普福等五比丘畫師像南歸。至中慶城四眾迎像入城。異光從像燭天。萬目仰觀翹勤傾信。由是興立禪宗。奉師為南詔第一

祖。師之法量汪洋辯才無礙。至於悲願誘掖諄諄誨諭。戶履日滿一無倦容。故登師之門者。如泛重溟不測涯涘。如飲醇酎不覺醉悅。及其勘辨學徒決擇心法。無假借慎許可。凜凜然如秋霜烈日。嚴不少貸。其為文信筆萬言了不經意。而其辭必歸於警昏瞶明宗旨闡義解顯正悟極於第一義諦而後已。若夫立身倡道。每視古德前言往行。或有缺漏輒為歎息。而師之行事則不蹈其失墜也。故師之立言示訓。非其素履而躬踐者。則終其身不言也。至於退恬逃名根于天性清苦自持尤矜細行。大覺師子二寺由師克成。及奉勅撰碑。師不惟不肯涉分寸功。并其名字亦不肯與於其間也。隨所寓草創菴廬。皆曰幻住。又因以自號焉。嘗隆暑病渴膚腠汗腐。有遺細葛褻衣者。受之終不衣也。遊淮汲井汲艱遠。遂終身不復類浴。聞說人過失則俯首不答。凡傳記語涉攻訐毀譽則掩卷不觀。僧有臥疾者。則濟以湯藥而策其進道。僧有省親者。則施以財法而勉其孝養。師嘗撰楞嚴徵心辯見或問一卷。信心銘闡義解一卷。山房夜話一

卷。幻住家訓一卷。擬寒山詩一百首。總題曰一華五葉。復撰金剛般若畧義一卷。別傳覺心一卷。東語西話一卷。門人集師遺文曰東語西話續集二卷。語錄十卷。別錄十卷。並傳于世。師之自序畧曰。余初心出家志在草衣垢面習頭陀行。以肩服田衣抱愧沒齒。平昔懶退非矯世絕俗。蓋以文字則失於學問。參究則闕於悟明。尋常為好事者之所稱道。蓋報緣之偶然耳。於戲師乘大悲願力為法壇度。觀時適宜隨機應物。如摩尼珠無有定色。為未證得謂證得者。說我無悟由。為求名聞利養者。韜晦巖谷。為毀犯律儀者。演毗尼法。為滯前塵而溺多聞者。闢知見海導以正悟。為圓機者直示向上。師皆以身先之。而不事夫空言也。然一心平等泯絕去來不留朕跡。槩非常情所得而窺測也。每念師出處言行。或承之於家訓。或見之於行事。或徵諸老宿。或質諸遺文。謹叙次而錄之。然猶以景像求師者也。其不可以景像求者。又烏得而盡紀也耶。

泰定元年八月甲子。法弟比丘祖順錄

中華三時繫念法事全集

戒定真香。焚起衝天上。弟子虔誠。爇在金爐放。頃刻紛紜。即徧滿十方。昔日耶輸。免難消災障。

南無香雲蓋菩薩摩訶薩

覺海虛空起。娑婆業浪流。

若人登彼岸。極樂有歸舟。

法王利物。悲智洪深。徧徧十方。冥陽靡隔。今蒙齋主^某恭為^某屆逢^某之期。特請山僧登座。依憑教法。作三時繫念佛事。迺爾亡靈。遭此勝緣。自宜嚴肅威儀。來臨座下。恭聆妙法。一心受度。

爐香乍爇。法界蒙熏。諸佛海會悉遙聞。隨處結祥雲。

誠意方殷。諸佛現全身。

南無雲來集菩薩摩訶薩

此一瓣香。根蟠劫外。枝播塵寰。不經天地以生成。豈屬陰陽而造化。爇向爐中。專伸供養。常住三寶。剎海萬靈。極樂導師。阿彌陀佛。觀音勢至。清淨海眾。悉仗真香。普同供養。

南無香雲蓋菩薩摩訶薩

第一時法事

南無蓮池海會佛菩薩

佛說阿彌陀經（詳附錄一——彌陀要解研習報告）

如是我聞。一時佛在舍衛國。祇樹給孤獨園。與大比丘僧。千二百五十人俱。皆是大阿羅漢。眾所知識。長老舍利弗。摩訶目犍連。摩訶迦葉。摩訶迦旃延。摩訶俱絺羅。離婆多。周利槃陀伽。難陀。阿難陀。羅睺羅。憍梵波提。賓頭盧頗羅墮。迦留陀夷。摩訶劫賓那。薄拘羅。阿菟樓駄。如是等諸大弟子。并諸菩薩摩訶薩。文殊師利法王子。阿逸多菩薩。乾陀訶提菩薩。常精進菩薩。與如是等諸大菩薩。及釋提桓因等。無量諸天大眾俱。

爾時佛告長老舍利弗。從是西方。過十萬億佛土。有世

界名曰極樂。其土有佛。號阿彌陀。今現在說法。舍利弗。彼土何故名爲極樂。其國衆生無有衆苦。但受諸樂。故名極樂。又舍利弗。極樂國土。七重欄楯。七重羅網。七重行樹。皆是四寶周匝圍繞。是故彼國名爲極樂。又舍利弗。極樂國土。有七寶池。八功德水。充滿其中。池底純以金沙布地。四邊階道。金銀瑠璃玻瓈合成。上有樓閣。亦以金。銀。瑠璃。玻瓈。磲磔。赤珠。碼瑙。而嚴飾之。池中蓮華。大如車輪。青色青光。黃色黃光。赤色赤光。白色白光。微妙香潔。舍利弗。極樂國土成就如是功德莊嚴。又舍利弗。彼佛國土。常作天樂。黃金爲地。晝夜六時。雨天曼

陀羅華。其土衆生。常以清旦。各以衣祴。盛衆妙華。供養他方十萬億佛。即以食時。還到本國。飯食經行。舍利弗。極樂國土成就如是功德莊嚴。復次舍利弗。彼國常有種種奇妙雜色之鳥。白鶴。孔雀。鸚鵡。舍利。迦陵頻伽。共命之鳥。是諸衆鳥。晝夜六時。出和雅音。其音演暢五根。五力。七菩提分。八聖道分。如是等法。其土衆生。聞是音已。皆悉念佛念法念僧。舍利弗。汝勿謂此鳥。實是罪報所生。所以者何。彼佛國土。無三惡道。舍利弗。其佛國土。尚無惡道之名。何況有實。是諸衆鳥。皆是阿彌陀佛。欲令法音宣流。變化所作。舍利弗。彼佛國土。微風吹動諸寶行

樹。及寶羅網。出微妙音。譬如百千種樂。同時俱作。聞是音者。自然皆生念佛念法念僧之心。舍利弗。其佛國土成就如是功德莊嚴。

舍利弗。於汝意云何。彼佛何故號阿彌陀。舍利弗。彼佛光明無量。照十方國。無所障礙。是故號為阿彌陀。又舍利弗。彼佛壽命。及其人民。無量無邊阿僧祇劫。故名阿彌陀。舍利弗。阿彌陀佛。成佛已來。於今十劫。又舍利弗。彼佛有無量無邊聲聞弟子。皆阿羅漢。非是算數之所能知。諸菩薩衆。亦復如是。舍利弗。彼佛國土成就如是功德莊嚴。

又舍利弗。極樂國土。衆生生者。皆是阿鞞跋致。其中多有一生補處。其數甚多。非是算數所能知之。但可以無量無邊阿僧祇說。舍利弗。衆生聞者。應當發願。願生彼國。所以者何。得與如是諸上善人。俱會一處。

舍利弗。不可以少善根福德因緣。得生彼國。舍利弗。若有善男子。善女人。聞說阿彌陀佛。執持名號。若一日。若二日。若三日。若四日。若五日。若六日。若七日。一心不亂。其人臨命終時。阿彌陀佛。與諸聖衆。現在其前。是人終時。心不顛倒。即得往生阿彌陀佛極樂國土。舍利弗。我見是利。故說此言。若有衆生。聞是說者。應當發願。生

彼國土。

舍利弗。如我今者。讚歎阿彌陀佛不可思議功德之利。東方亦有阿閼鞞佛。須彌相佛。大須彌佛。須彌光佛。妙音佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念經。舍利弗。南方世界。有日月燈佛。名聞光佛。大燄肩佛。須彌燈佛。無量精進佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念經。舍利弗。西方世界。有無量壽佛。無量相佛。無量

幢佛。大光佛。大明佛。寶相佛。淨光佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念經。舍利弗。北方世界。有燄肩佛。最勝音佛。難沮佛。日生佛。網明佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念經。舍利弗。下方世界。有師子佛。名聞佛。名光佛。達摩佛。法幢佛。持法佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德。一切

諸佛所護念經。舍利佛。上方世界。有梵音佛。宿王佛。香上佛。香光佛。大燄肩佛。雜色寶華嚴身佛。娑羅樹王佛。寶華德佛。見一切義佛。如須彌山佛。如是等恆河沙數諸佛。各於其國。出廣長舌相。徧覆三千大千世界。說誠實言。汝等衆生。當信是稱讚不可思議功德。一切諸佛所護念經。

舍利弗。於汝意云何。何故名爲一切諸佛所護念經。舍利弗。若有善男子善女人。聞是經受持者。及聞諸佛名者。是諸善男子善女人。皆爲一切諸佛之所護念。皆得不退轉於阿耨多羅三藐三菩提。是故舍利弗。汝等皆當信受我語。及

諸佛所說。舍利弗。若有人已發願。今發願。當發願。欲生阿彌陀佛國者。是諸人等。皆得不退轉於阿耨多羅三藐三菩提。於彼國土。若已生。若今生。若當生。是故舍利弗。諸善男子善女人。若有信者。應當發願。生彼國土。舍利弗。如我今者。稱讚諸佛不可思議功德。彼諸佛等。亦稱讚我不可思議功德。而作是言。釋迦牟尼佛。能爲甚難希有之事。能於娑婆國土。五濁惡世。劫濁。見濁。煩惱濁。衆生濁。命濁中。得阿耨多羅三藐三菩提。爲諸衆生。說是一切世間難信之法。舍利弗。當知我於五濁惡世。行此難事。得阿耨多羅三藐三菩提。爲一切世間說此難信之法。是爲甚難。佛

說此經已。舍利弗。及諸比丘。一切世間天人阿修羅等。聞佛所說。歡喜信受。作禮而去。

佛說阿彌陀經

拔一切業障根本得生淨土陀羅尼（詳附錄二）

南無蓮池會菩薩摩訶薩

世界何緣稱極樂。只因眾苦不能侵。

道人若要尋歸路。但向塵中了自心。

心心即佛。醍醐酥酪。咸自乳生。佛佛惟心。釵釧瓶盤。盡從金出。十萬億程。東西不隔。二六時內。凡聖同途。低頭合掌白玉毫。星明日麗。歌詠讚揚紫金容。霆震雷轟。清涼月兮有水皆含。功德雲而無山不戴。香象渡河。一

舉洪名超二死。迦陵出穀。千稱嘉號壓群音。下情唯忖以難思。一念回光而易往。究竟不居心外。分明祇在目前。審如是。即今眾等。繫念彌陀。三時佛事。只如不涉證修。親蒙授記一句。如何舉揚。

風吟樹樹千般樂。香浸池池四色華。

阿彌陀佛身金色。相好光明無等倫。

白毫宛轉五須彌。紺目澄清四大海。

光中化佛無數億。化菩薩眾亦無邊。

四十八願度眾生。九品咸令登彼岸。

南無西方極樂世界。大慈大悲。阿彌陀佛。

第一大願。觀想彌陀。四十八願度娑婆。九品湧金波。

寶網交羅。度亡靈出愛河。

南無蓮池會菩薩摩訶薩

諸苦盡從貪欲起。不知貪欲起於何。

因忘自性彌陀佛。異念紛馳總是魔。

教中道。生而無生。法性湛然。無生而生。業果儼然。所謂生者。即眾生生滅之迹也。謂無生者。即諸佛寂滅之本也。法性湛然者。靈明湛寂。玄妙真常。箇箇不無。人人本具。只因最初不覺。忽爾動心。認妄為真。迷已逐物。由是業網牽纏。流轉五道。恆隨生死以升沈。亙古至今而靡間。當知生自緣生。而法性不與緣俱生。滅自緣滅。而法性不與緣俱滅。所以云。法性湛然。是謂生而無生者也。無生而生者。眾生迷妄入心。積業成果。虛受輪轉。妄見生滅。於法

性體上。如鏡現像。似珠隨色。當知鏡光本淨。珠體絕痕。物境互彰。不違色像。彼色像之去來。猶業果之儼然也。故諸佛於儼然生滅中。唯見無生。眾生於湛然無生中。唯見生滅。只因迷悟之有差。遂致現量之不一。實乃生無自性。無生亦無自性。悟則生滅皆無生。迷則無生皆生滅。所以離此別無。是乃一體而異名也。審如是。則阿彌陀佛即是我心。我心即是阿彌陀佛。淨土即此方。此方即淨土。豈非迷悟之自殊。何有聖凡而彼此。乃知現前眾等。以自性阿彌陀。與大眾舌根。普同運轉根本法輪。諸仁還委悉麼。

生滅無生生不生。樂邦那肯禁人行。

誰知萬丈紅塵裡。萬萼華開月正明。

南無西方極樂世界。大慈大悲。阿彌陀佛。

一者禮敬諸佛。二者稱讚如來。
 三者廣修供養。四者懺悔業障。
 五者隨喜功德。六者請轉法輪。
 七者請佛住世。八者常隨佛學。
 九者恆順衆生。十者普皆回向。
 衆生無邊誓願度。煩惱無盡誓願斷。
 法門無量誓願學。佛道無上誓願成。
 佛寶讚無窮。功成無量劫中。巍巍丈六紫金容。覺道雪
 山峰。眉際玉毫光燦爛。照開六道昏蒙。龍華三會願相逢。
 演說法真宗。

人人分上。本有彌陀。箇箇心中。總為淨土。了則頭頭
 見佛。悟來步步西方。上來啟建三時繫念淨業道場。今當第
 一時佛事已圓。如上殊勳。投入彌陀大願海中。專為亡靈_某
 求生淨土。但念自從無始。迄至今生。一念違真。六根逐
 妄。隨情造業。縱我為非。身業則殺盜邪淫。口過則妄言綺
 語。兩舌惡口。意惡則常起貪瞋。深生痴愛。由茲三業。鉤
 鎖妄緣。常汨汨於塵勞。但茫茫於歲月。欲思出離。唯憑懺
 悔熏修之力。俾眼耳鼻舌身意之過愆。應念頓消。使色聲香
 味觸法之浮塵。即時清淨。又極樂求生。全憑發願。仰勞法
 眾。異口同音。敬為亡靈至心懺悔發願。

往昔所造諸惡業。皆由無始貪瞋痴。
從身語意之所生。今對佛前求懺悔。
眾生無邊誓願度。煩惱無盡誓願斷。
法門無量誓願學。佛道無上誓願成。

南無普賢王菩薩摩訶薩

上來懺悔發願已竟。亡靈^某當知。夫淨土之為教也。仰承阿彌陀佛四十有八。大慈大悲。深重願力。攝取十方一切眾生。凡具信心者。皆得往生。信者。信有西方淨土。信有阿彌陀佛。攝取眾生之事。我等眾生。信有往生之分。然雖謂彌陀攝取眾生往生。要信唯是隨心自現。感應道交。究竟非從外得。如是信者。是為真信。信而無行。即不成其信。行者。楞嚴經云。都攝六根。淨念相繼。不假方便。自得心

開。阿彌陀經云。若有善男子。善女人。聞說阿彌陀佛。執持名號。若一日。若二日。乃至七日。一心不亂。其人臨命終時。阿彌陀佛。與諸聖眾。現在其前。是人終時。心不顛倒。即得往生阿彌陀佛極樂國土。如是行者。是名正行。行而無願。即不成其行。願者。要與阿彌陀佛。四十八願。願願相應。是為大願也。信行願三。如鼎三足。缺一不可。今爾亡靈當知現前一念。本自圓常。信行願。原是自己本來具有。如是性德。今者但是本性光明顯發耳。

阿彌陀佛。無上醫王。巍巍金相放毫光。苦海作慈航。

九品蓮邦。同願往西方。

南無蓮池會菩薩摩訶薩

第二時法事

南無蓮池海會佛菩薩

佛說阿彌陀經

拔一切業障根本得生淨土陀羅尼

南無蓮池會菩薩摩訶薩

便就今朝成佛去。樂邦化主已嫌遲。

那堪更欲之乎者。管取輪迴沒了時。

原夫徧十方是極樂世界。山光水色。似空合空。盡大地是清泰故鄉。華笑鳥啼。如鏡照鏡。自是不歸歸便得。五湖煙景有誰爭。黃金臂晝夜常垂。惟許行人獨委。白玉毫古今

不昧。全憑願者承當。所以道。萬法是心光。諸緣惟性曉。本無迷悟人。只要今日了。即今現前眾等。繫念第二時佛事。且了之一句。如何舉揚。

琉璃池上懸明月。菡萏華間戲水禽。

阿彌陀佛身金色。相好光明無等倫。

白毫宛轉五須彌。紺目澄清四大海。

光中化佛無數億。化菩薩眾亦無邊。

四十八願度眾生。九品咸令登彼岸。

南無西方極樂世界。大慈大悲。阿彌陀佛。

第一大願。觀想彌陀。四十八願度娑婆。九品湧金波。

寶網交羅。度亡靈出愛河。

南無蓮池會菩薩摩訶薩**是心是佛將心念。念到心空佛亦忘。****撒手歸來重檢點。華開赤白與青黃。**

教中道。惟心佛亦爾。惟佛眾生然。心佛及眾生。是三無差別。所謂心者。心有多種。曰肉團心。乃現在身中。父母血氣所生者是。曰緣慮心。即現今善惡順逆境界上。種種分別者是。曰靈知心。是混千差而不亂。歷三際以靡遷。炳然獨照。卓爾不群。在聖不增。在凡不減。處生死流。驪珠獨耀于滄海。居涅槃岸。桂輪孤朗于中天。諸佛悟之。假名惟心。眾生迷之。便成妄識。是以佛即眾生。眾生即佛。且心外無佛。亦無眾生。唯迷悟之有間。故凡聖而迥異。豈知心佛眾生。三無差別。永嘉云。夢裡明明有六趣。覺後空空

無大千。既然如是。則經云。從是西方。過十萬億佛土。有世界名曰極樂。其土有佛號阿彌陀。今現在說法。總不出唯心淨土。本性彌陀也。由是而知。即今現前亡靈某其生也蓮華朵朵。其歿也行樹重重。無一時不達蓮邦。無一念不依慈父。審如是。且道。離此心佛眾生外。別有商量處也無。

大圓鏡裡絕纖埃。碧藕華中有聖胎。**遙望金沙池沼外。寶光常照玉樓臺。****南無西方極樂世界。大慈大悲。阿彌陀佛。****十方三世佛。阿彌陀第一。九品度衆生。威德無窮盡。**

我今大歸依。懺悔三業罪。凡有諸福善。至心用回向。願同念佛人。感應隨時現。臨終西方境。分明在目前。見聞皆精

進。同生極樂國。見佛了生死。如佛度一切。無邊煩惱斷。
無量法門修。誓願度衆生。總願成佛道。虛空有盡。我願無窮。

願生西方淨土中。上品蓮華為父母。

花開見佛悟無生。不退菩薩為伴侶。

法寶實難量。如來金口宣揚。龍宮海藏散天香。覺者誦琅瑯。玉軸霞條金寫字。似排秋雁成行。昔因三藏取來唐。萬古為敷揚。

蓋聞虛而有鳴答之聲。寂而無形影之相。然谷響自然。非呼之而不答。佛身無作。非扣之而不彰。上來啟建第二時繫念佛事已圓。如上殊勳。投入如來大願海中。出生功德。

尚為亡靈某洗除業垢。增長善根。捨此報緣。往生淨土。但念自從無始。迄至今生。滙生巨海。逐識浪以高低。雲點太清。任情風而人我。於是循環諸趣。流轉四生。業海茫茫。罪山岌岌。匪憑發露。曷遂消除。懺摩已往。發願當來。再勞法眾。至心懺悔發願。

往昔所造諸惡業。皆由無始貪瞋痴。

從身語意之所生。一切罪障皆懺悔。

衆生無邊誓願度。煩惱無盡誓願斷。

法門無量誓願學。佛道無上誓願成。

南無普賢王菩薩摩訶薩

上來懺悔發願已竟。具行猶人具眼目。願如日月燈光明。依光照燭見分明。行者方能達前境。是以念佛之人。若

不發願往生。縱有功行。亦成虛設。以不順佛故。今爾亡靈。當知此意。

**阿彌陀佛。無上醫王。巍巍金相放毫光。苦海作慈航。
九品蓮邦。同願往西方。**

南無蓮池會菩薩摩訶薩

第三時法事

南無蓮池海會佛菩薩

佛說阿彌陀經

拔一切業障根本得生淨土陀羅尼

南無蓮池會菩薩摩訶薩

十萬餘程不隔塵。休將迷悟自疎親。

刹那念盡恆沙佛。便是蓮華國裡人。

合塵背覺。栽荆棘於七寶園林。捨妄歸真。列珠網於四生門戶。縱橫萬法。圓裹一心。非思量處。阿彌陀佛。坐斷六根。無造作時。清泰故鄉。橫吞八極。破群昏如杲日麗

天。療眾病如善見神藥。所以云。一稱阿彌陀佛名號。能滅八萬億劫生死眾苦。利益如是。豈譬喻言說之可及乎。只如即今繫念。第三時佛事。且道。現前眾等。同聲相應一句。如何指陳。

一從佛向舌根念。不覺華隨足底生。

阿彌陀佛身金色。相好光明無等倫。

白毫宛轉五須彌。紺目澄清四大海。

光中化佛無數億。化菩薩眾亦無邊。

四十八願度眾生。九品咸令登彼岸。

南無西方極樂世界。大慈大悲。阿彌陀佛。

第一大願。觀想彌陀。四十八願度娑婆。九品湧金波。

寶網交羅。度亡靈出愛河。

南無蓮池會菩薩摩訶薩

打破虛空笑滿腮。玲瓏寶藏豁然開。

直鏡空劫生前事。六字洪名畢竟該。

古人道。清珠投於濁水。濁水不得不清。念佛投於亂心。亂心不得不佛。西天有寶。名曰清珠。謂此珠。投入濁水中。入水一寸。則一寸之濁水。即便清潔。此珠入水。自寸至尺。乃至於底。則濁水亦隨之而澄湛。當知清珠者。喻念佛之淨念也。濁水者。喻雜亂之妄心也。當妄心雜亂之頃。能舉起一念。如對慈尊。按定六字洪名。一一出口入耳。則此雜亂。自然隨念寂靜。自是一念。而至十念。乃至念念不移。即教中所謂淨念相繼者也。念佛之人。須要信心

懇切。正因凜然。重念死生輪轉之可悲。深厭塵勞紛擾為可痛。舉起一聲佛名。直下更無異見。如太阿劍。橫按當軒。如大火輪。星騰皎熾。萬物撓之則燎。觸之則傷。直至一心不亂。能所兩忘。到家之說。不容再舉。捷徑之詞。何勞挂齒。可謂證修行之神術。超方便之正途。破死生蟄戶之雷霆。燭迷妄幽衢之日月。今宵三時繫念佛事將圓。亡靈某承茲上善。決定往生。且道一念未萌以前。還有者箇消息也無。

是心空寂念何依。故國云歸孰未歸。

華外玉雞啼曉日。遙迎新佛奉慈威。

南無西方極樂世界。大慈大悲。阿彌陀佛。

一心歸命。極樂世界。阿彌陀佛。願以淨光照我。慈誓

攝我。我今正念。稱如來名。為菩提道。求生淨土。佛昔本誓。若有衆生。欲生我國。志心信樂。乃至十念。若不生者。不取正覺。以此念佛因緣。得入如來大誓海中。承佛慈力。衆罪消滅。善根增長。若臨命終。自知時至。身無病苦。心不貪戀。意不顛倒。如入禪定。佛及聖衆。手執金臺。來迎接我。於一念頃。生極樂國。華開見佛。即聞佛乘。頓開佛慧。廣度衆生。滿菩提願。

念佛臨終見寶臺。寶幡寶蓋滿空排。

彌陀勢至觀音等。合掌相隨歸去來。

僧寶不思議。身披三事雲衣。浮盃過海剎那時。赴感應

**群機。堪作人天功德主。堅持戒行無違。我今稽首願遙知。
振錫杖提攜。**

念佛既從心出。結業豈屬外來。須臾背念佛之心。剎那即結業之所。今則眾等。依憑教法。作三時繫念佛事。所集勝因。專為亡靈^某決生淨土。自今戒香馥郁。慧炬熒煌。迷雲開而性天獨朗。妄塵盡而心地廓通。諸根圓淨。群業頓空。一舉念。一華開。挹露迎風。香浮玉沼。一馳情。一果熟。含煙對日。影落金園。經行坐臥在其中。游戲逍遙非分外。得佛受用。徹法源底。常寂光處處現前。大願王塵塵契會。更為亡靈。至心懺悔發願。

往昔所造諸惡業。皆由無始貪瞋痴。

從身語意之所生。一切罪根皆懺悔。

自性眾生誓願度。自性煩惱誓願斷。

自性法門誓願學。自性佛道誓願成。

南無普賢王菩薩摩訶薩

上來三時繫念。阿彌陀佛。萬德洪名。勸導亡靈^某。懺除結業。發願往生。行願既深。功無虛棄。惟願亡靈。聞斯法要信受奉行。從是托質蓮胎。永離業海。直證阿鞞跋致。圓滿無上菩提。

彌陀佛。大願王。慈悲喜捨難量。眉間常放白毫光。度眾生極樂邦。八德池中蓮九品。七寶妙樹成行。如來聖號若宣揚。接引往西方。彌陀聖號若稱揚。同願往西方。

繫念功德殊勝行。無邊勝福皆回向。

普願沈溺諸衆生。速往無量光佛刹。

十方三世一切佛。一切菩薩摩訶薩。

摩訶般若波羅蜜。

自歸依佛。當願衆生。體解大道。發無上心。

自歸依法。當願衆生。深入經藏。智慧如海。

自歸依僧。當願衆生。統理大衆。一切無礙。

和南聖衆。

中峯三時繫念法事